



КОНКУРС «Астана и Президент»

**Әбуғалиева Назерке,
Абай атындағы 12 жылдық орта мектебінің 9 сынып
оқушысы**

Тәуелсіз ел Тұңғыш Президентімен

1991 жылы 16 желтоқсан күні Қазақстан өзін – Тәуелсіз ел деп жариялады. Осы күнге дейін Ресей отары болып келген қазақ халқы, енді-енді ес жиып, көзін ашып, басын көтеріп, «Біз қазақпыз!» деп жар салатын күнге де жетті. Ғасырлар бойы аңсаған азаттыққа қол жеткізді. Бұл тәуелсіздік жолында қазақтың қаншама қаны төгілді, қаншама рет қазақ жері бөліске түсіп, тілі, мәдениеті өзгенің табанында жаншылып жатты. Тәуелсіздік, азаттық жолындағы күресте ата - бабаларымыздың істеген ерлігін айтып тауыса алмаспыз...

Қазақстан өз тәуелсіздігін алған жылы, желтоқсанның бірі күні, бүкілхалықтық Президент сайлауы өтті. Барша халық қолдауымен Нұрсұлтан Әбішұлы Назарбаев Қазақстанның Тұңғыш Президенті болып сайланды. Елбасымыз бүкіл әлем қазақ елін мойындау үшін, ең алдымен, 1991 жылдың 10 желтоқсан күні еліміздің атын Қазақстан Республикасы деп өзгертті. Осылайша, Қазақстан тәуелсіздік жолындағы алғашқы қадамын басты. Президентіміз Нұрсұлтан Әбішұлының мойнына үлкен де ауыр жүк артылды. Тәуелсіздіктің алғашқы жылдары Қазақстан тоқырау алдында тұрған үлкен дағдарысты бастан кешірді. Елі үшін ерекше жаратылған, қазақтың алған бетінен қайтпайтын қайсар қара нары, Елбасымыз, осы дағдарысқа жол бермей, өзінің асқан ақылдылығымен, көрегендігімен, парасаттылығымен төтеп бере алды.

Нұрсұлтан Әбішұлы Қазақстанның шет мемлекеттермен ынтымағы, бірлігі жарасқан ел болуы үшін 1991 жылы 21 желтоқсан күні әр түрлі ұлт өкілдері қатысуымен Алматыда өткен басқосуда Тәуелсіз Мемлекеттер Достастығына мүше болды. Сонымен қатар, 1992 жылы 2 наурызда Біріккен Ұлттар Ұйымына мүше болып қабылданды. Президентіміз елдің басына үлкен қайғы-қасірет әкелген, қара бұлт болып төнген, көптеген жылдар бойы құтыла

алмай азап шектірген «Семей – Невада» полигонын жапқызып, болашақ ұрпақтарының денсаулығын сақтап қалды. 1997 жылы астананы Алматы қаласынан Орталық Қазақстанда орналасқан Ақмола қаласына ауыстырып, ертедегі ата – бабаларының көксеген арманына қол жеткізді. Ақмола қаласының аты – Астана болып өзгертілді. Осылай, отанымыздың жүрегі, тәуелсіздігіміздің тірегі болған Астана қаласының тұсаукесер тойы, 1998 жылы 10 маусымда, салтанатты түрде аталып өтті. Астана – Есіл өзенінің жағасын бойлай есіле, көсіле орналасқан, көлге қонған ақ шағалалардай көздің жауын алған әсем қала. Әлемнің түкпір - түкпірінен келіп жататын шетел азаматтарының және жалпы Қазақстандықтардың тамсана да таңдана, қызыға да қызғана қарайтын, ауыздарынан тастамайтын мәдени ошағы, халық тұрағы. Астана – зәулім аппақ ғимараттары жыл сайын бой көтерген, қатарға қосылған, «мен мұңдалап» алыстан көз тартатын үлкен Ел Ордаға айналды. Елбасымыздың қажымай, талмай еткен еңбегінің, асқан ақылдылығының арқасында, 1998 жылы ЮНЕСКО-ның шешімімен, Астанаға алтын медаль және «Әлем қаласы» деген жоғары атақ берілді. Таңқаларлығы: Астана қаласы бар-жоғы 13 жыл ішінде дүниежүзіне белгілі болып, талай елдердің көзін қызықтырып, күрт өзгеріп шыға келді. Елбасымыздың бастауымен Астанада ғажайып ғимараттар бой көтерді. Соның бірі – Астананың бойтұмарына айналған, 97 метрлік биіктігімен, еліміздің жаңа тарихынан бастау алатын «Бәйтерегіміз». «Аялы алақан» композициясында өз халқына бейбітшілік кепілі болуға, келісім мен достықты сақтауға, барлық қазақстандықтардың жарқын болашақ туралы армандарын жүзеге асыруға ант берген Қазақстан Республикасының Тұңғыш Президенті Нұрсұлтан Әбішұлы Назарбаевтың оң қолының таңбасы бедерленген. Елбасымыздың бастамасымен, әлемнің әр түкпірінен жиналған 17 түрлі дін өкілдері, Бәйтеректің биігінде тұрып, қазақ елі мен жеріне, бейбітшілік пен тыныштықты сақтай отырып, алға дамуына тілек білдіріп, баталарын берді. «Бәйтерек» өз қонақтарына, құс самғайтын биіктіктен, жаңа Астананың тың келбетін ұсынды. Елбасымыздың бастауымен 2005 жылы 22 наурызда, Ұлыстың ұлы күнінде, «Нұр – Астана» деп аталатын үлкен мешіттің ашылу салтанаты өтті. Бұл күні жуанның жіңішкеріп, жіңішкенің үзілетін, Күн мен Түннің теңесетін қасиетті күнінде Алла үйінің ашылу салтанатын көріп, жұма намазына жығылуға жиналған көпшілікте есеп болмады. Әлемнің әр қиырынан Астанада бас қосып, төрт тағаны Есілде, ұшар басы зеңгір көкте, кескін-келбеті бар әлемге айқара есігін ашып тұрған Бейбітшілік пен келісім Сарайы Нұрсұлтан Әбішұлы Назарбаевтың, көршілес елдер басшыларының қатысуымен 2006 жылы 1 қыркүйекте ашылды. Елімізді көгалдандыру мақсатында «Жасыл ел» бағдарламасы жасалды.

Елбасымыздың осы жылдар ішінде елімізді осындай дәрежеге жеткізгенін Қазақстанда тұратын көптеген ұлт өкілдері мақтанышпен айтып жүр.

Қазақстан – татулығы, бірлігі, ынтымақтастығы жарасқан көп ұлтты ел. Нұрсұлтан Әбішұлының халыққа жолдауында айтылғандай, елімізді, жерімізді қорғап қалу жолында татулық, бірлік қандай қажет болса, бүгінгі таңда тәуелсіздігіміздің қол жеткізген табыстарын, жемістерін сақтап қалу үшін де татулық, бірлік ауадай қажет болып табылады. Қазақстан халқының әлеуметтік-экономикалық жағдайын, болашақ ұрпақтарының денсаулығын, білімді болуын ойлаған Елбасымыз «Жүз мектеп, жүз аурухана» бағдарламасын жасап, еліміздің кез келген аумағынан жаңа мектептер мен балабақшалар, жана ауруханалар ашқызып, күннен-күнге халықтың әл-ауқатын көтеру мақсатын көздеуде. 2010 жылдың қаңтар айынан бастап, Еуропадағы қауіпсіздік пен ынтымақтастық ұйымына төрағалық ете отырып, әр ұлт өкілдерінің ортасында Қазақстан халқының беделін арттыра түсуде.

Бүгінгі күні Қазақстан әлемдегі елдермен терезесі тең, төрт қабырғасы күллі әлемге шапағын шашқан шуақты да нұрлы, бейбіт елге айналуда. Осының бәрі – Елбасы Нұрсұлтан Әбішұлының ақылдылығының, көрегендігінің, күндіз-түні тынбай еткен еңбегінің жемісі. Жас қаламыз Астанада Қазақстан халқының болашақ тағдырына, дамуына қатысты көптеген мәселелер қаралып, әр түрлі заңдар мен нұсқаулықтар қабылданып, бекітіліп жататын басқару орталығы болса, бұрынғы бас қаламыз Алматы – ірі ғылыми, мәдениет және демалыс орталығы. Міне, Қазақстанда осындай күннен-күнге көркейген қалаларымыздың санының көбеюі бәрімізді қуантады, көңілімізге мақтаныш сезімін ұялатады, болашаққа сеніммен нық қадам жасауымызға көмектеседі. Біздер, Қазақстанның одан әрі дамып, көркеюіне атсалысатын болашақ жастары, осындай Елбасымыз болғанына мақтанып, шүкіршілік етеміз, алдағы уақытта өз еліміздің дамуына, өркендеуіне үздік оқуымызбен, табысты еңбегімізбен аз да болса, әрқайсысымыз өзіміздің мүмкіндігімізше үлес қоссақ деген ниеттеміз.